

COMUNANZA

Dèlba e Penia à desleà chel mat de Carnascèr

Ai 17 e 20 de jené l'è stat sègra tinsom la val. Ta Penia l'è stat reingrazià Francesco Verra e Gigi Marchetti. Do trei egn l'è stat da nef mascherèda ta la veia scoles



La autoritèdes e i gropes de folclor no è mencé a la funziòn te gejia en ocajion de la sègres de Dèlba e Penia.



Bufon e Laché è jic fora per la cèses. Chiò i è te stua de Assunta de Mario.



I atores che à portà in scena «L'è ruà bërba Jan».



Francesco Verra e Gigi Marchetti col capofrazion Stefano Salvador e i componenc del comitat ASUC.

Se sà che la doi sègres de Dèlba e Penia l'è la prumes te Val e les ge desc l'via al temp del Carnascèr: ence chest an l'è stat coscità! Ta Dèlba, da Sènt'Antone da la Ciampaneles, dadoman via l'è stat dit messa da don Mario Bravin. A la funziòn à tout pèrt l'Grop de folclor de Cianacei, i Scizeres de Fasha, na raprejentanza de la Musega Auta Fascia e di Studafech de Cianacei. Anter l'autoritèdes l'era i presidenc de l'Union Generela di Ladins dla Dolomites e de l'Union de Fascia, Antone Pollam e Fernando Brunel, e l'capofrazion de Cianacei Rinaldo Debertol. La Frazion de Dèlba con sie capofrazion Olivo Micheluzzi à dapò indrezà ence la marena e la ola de la fortuna. Daveeder se l bon Sènt instadi l ge à cignà a vèlch tousa...

Ai 20 de firé, da Sèn Bastian, don Mario à dit messa ence ta Penia, olache anter l'autoritèdes l'era l ombolt Giovanni Bernard, l'capo-

frazion de Penia Stefano Salvador e i componenc del comitat ASUC. Te Piazo do messa l Grop de la Mèscre de Dèlba e Penia à dat fora t'è ciaut e brulé.

A la marena indrezèda al restorant El Panarel à tout pèrt chi de la Frazion de Penia, la Jonta de Comun, i capofrazion de Dèlba, Cianacei e Gries, don Mario, l procurador Detomas, l conseier provinzièl Guglielmi, la secretèra de Comun e cheles de la Frazion, i presidenc de la Union Generela e de Fascia. L'è stat n bel moment per reingrazièr per dut l'urier che l'è fat Francesco Verra, stat capofrazion per 40 egn alalèngia e che acà 2 egn no l se èa più metù a la leta: n bel recogno-sciment, ruà tardif per via de la pandemia. G'è stat dit devepai dapodò ence a Luigi Marchetti che l'è jic in penscion, stat per n muie a servije de la Frazion desche secretèr. A duc doi g'è stat regalà na statua de Sèn Bastian.

La mèscres se mola fora do 3 egn

La Mèscre, tel di de la sègra de pais, ge à dat apuntamento a sie publich fideil per la pruma mascherèda de chest temp de Carnascèr. Chest tant l'è stat anuzià, estra che per radio e tras i social, ence fora per la cèses de Dèlba e Penia da doi cobies de Laché e Bufon, descheche domana la tradizion. I à invià la jent a mascherèda e i ge à anuzià che se deslea Carnascèr.

Atores e Gran Mèscre se à dapodò binà invers les ot lo da cèsa de Mario de la Ninotes rechia, per se trèr ite guanc e bronsins e per se fèr doi ciacoles: gregn e picoi, duc adum, emozioné per la sera che èa da vegnir. No l'è mencità la giostra te piazz, olache Marascons, Bufons e Lachees à sira con sauc dintorn festil.

«Domane de poder vegnir ite te chest ciastel o palaz che sie, con duta mia

bela e gran compagnia», à domanà l'prum Laché sun usc de la veia scoles. L'è coscità vègnù ite do Bufons e Marascons che con sie bronsins e patofies, vic e ac à soscedà grignèdes e emozion anter la jent che no à volù mencèr a chest apuntamento. No l'è stat sparagnà nescugn, nience l'president Ezio, che – a dita del bufon – no l'è mià tant ascort desche sugeritor.

L'è ruà bërba Jan

E se vègnissa de retorn da la Merica bërba Jan? Coi bafi, la bërba e pien de scioldi, adertura milionèr? Ben, la mascherèda «L'è ruà l bërba Jan», scritta ju dal maor scrittor populèr de noscia Val, Simon Soraperra de Giulio, proa belimpont a ge resoner a chesta domanes.

Sie nez Crestan, interpretà da Diego Salvador, l'è n pitor ecletich, l'realisea teiles che ge fèsc vadagnèr de bie scioldi. Te stua l'è ence l

model Luca Dantone de Piero, alias Giòchele, con de bela massela rosses e chel zeche de atratif per la mosses. L'è te chest chèder dut stramp che pea via la mascherèda.

Na bela di rua te majon de Crestan sie jorman Vagere, portà in scena da Damiano Casagranda, che l'ge disc la neva: l'è ruà te pais bërba Jan regolà da pere cos, ge vel pa ge dèr l benvegnù coche carenea a el, e a sie milions... sessaben! Esser ritadins de n t'èl patrimonie, jissa ben a chichemai... ma nos no ve dizon più nia de coche i è jic i fac da chiò inant, saassà demò che l'publich à dassen grignà de gust!

Zeche cognon ampò ve l'è dir amò: rejonon di etres atores. No mencia sun paladina l'inom de Stenterello, Simone Valeruz, n personaje che se troa amò te la produzion del scrittor da Penia. A spilenèr con fèr feruscol l'è stat ence Angela Soraperra desche Menana, femena de Crestan, Matteo Iori e Gianpaolo Daprai, duc doi co la bërba e i bafi. La mascherèda, scritta te n bon fascian, la è stata caraterisèda da na recitazion de biot comedia: nience instouta no l'è mencità la caricatura del 'talian' e oujes strupièdes e camufèdes ite. Sessaben che ogne picol fal, comèda ite da n batiman, ge à fat passèr amò de più a duc chenc na bela sera de mascherèda!

«L'era da 3 egn che no ve fajane più mascherèda!» à dit ju de paladina Ezio Verra, president de la Mèscre, al scomenz de la raprejentazion. Desche zenza, e fosc chest'outa amò de più, la sala era piena e rèsa de jent no demò de Dèlba e Penia, ma da duta canta la Val. Do mascherèda, no l'è mencità la musega de orghins e chitara: a roda Marco, Claus, Martin e Cristof à compagnà i camaric e l'è ruà adertura ite per un l'ouf spaentà con n giagher col schiop che ge corea do.

No ve aon contà dut cant chel che l'è suzedù te stua de Crestan, ajache podède jir a ge vardèr instesc a chesta mascherèda, e tor pèrt a chesta sera de Carnascèr ladin canche la vegnarà da nef portèda dant en jebia grassa, ai 16 de firé. I apuntamenc ta Penia no è fenii chiò: ai 4 e ai 21, mèrtesc de Carnascèr, vegnarà spilenà na mascherèda delud neva scritta ju da Stefan Monech, dal titol «La batola de bërba Simon»... de chisc bèrbesc chest an n'è dassen dutintorn!

Nicoletta Ris